

anoa ia i tatou. O le mea lenei sa faailoa atu e se tama e 96 tausaga le matua ina ua fesili lona atalii, “Tama, aisea e te alu ai i le lotu? E le mafai ona e vaai, e le mafai ona e faalogo, e faigata ona e fealuai. Aisea e te alu ai i le lotu?” Sa tali atu le tama, “O le faamanatuga. Ou te alu e ‘ai ma inu i le faamanatuga.”

Tau ina ia taitasi i tatou ma o mai saunia i le sauniga faamanatuga ina ia maua “se aafiaga faaleagaga moni, se sauniga paia, se toefaafouina mo lo [tatou] agaga.”¹⁸

Ou te iloa o loo soifua lo tatou Tama Faalelagi ma lo tatou Faaola. Ou te faafetai mo le avanoa ua saunia e le faamanatuga ia lagona ai lo Laua alofa ma ia aai ma feinu ai i le Agaga. I le suafa o Iesu Keriso, amene. ■

FAAMATALAGA

1. Jeffrey R. Holland, *Christ and the New Covenant: The Messianic Message of the Book of Mormon* (1997), 283.
2. Tagai Mataupu Faavae ma Feagaiga 20:77.
3. Henry B. Eyring, “Ina Ia Tasi I Tatou,” *Liahona*, Iulai 1998, 67.
4. Mataupu Faavae ma Feagaiga 20:77, 79.
5. Iosefa Samita Faaliliuga, Mataio 26:22 (i le Mataio 26:26, vaefaamatalaga *i*, ma le faaopoopo i le Tusi Paia).
6. Iosefa Samita Faaliliuga, Mataio 26:24 (i le faaopoopoga o le Tusi Paia); tagai foi Mataio 26:26–28; Mareko 14:22–24; Luka 22:15–20.
7. Tagai 3 Nifae 18:7, 11; Mataupu Faavae ma Feagaiga 20:75.
8. Tagai “How Do I Keep My Covenant to Always Remember the Savior?” *Sau, Mulimuli Mai ia te Au* mataupu aoaoina o le Aoga Sa; lds.org/youth/learn/ss/ordinances-covenants/remember; *Faamaoni i le Faatuatua: O Se Tusitaitala o le Ekalesia* (2004), 45–46.
9. Mataupu Faavae ma Feagaiga 20:77.
10. Ioane 14:15.
11. Melvin J. Ballard, in Melvin R. Ballard, *Melvin J. Ballard: Crusader for Righteousness* (1966), 132–33.
12. Ioane 6:48.
13. Ioane 4:10.
14. 3 Nifae 20:8–9.
15. Mataupu Faavae ma Feagaiga 20:77.
16. 3 Nifae 9:14.
17. Ou te faafetai ia Ann Madsen mo lona malamalamaaga i lenei mataupu faavae.
18. Jeffrey R. Holland, *Christ and the New Covenant*, 283.



Saunia e Elder Chi Hong (Sam) Wong

○ Le Fitugafulu

Laveai i le Lotogatasi

Ina ia mafai ona fesoasoani atu i le Faaola, e tatau ona tatou galulue faatasi i le lotogatasi ma le aufaatasi. E taua tagata uma, tofiga uma, ma valaauga uma.

Emasani ona faalogo atu ia Peresitene Thomas S. Monson o saunoa mai, “Aapa atu e laveai.”¹ Ou te mafaufau i se tala i le Feagaiga Fou. O se faataitaiga tonu lava lea o le auala e mafai ai e tagata ma faifeautalai ona galulue faatasi i le lotogatasi e ala i le aapa atu o aufono a uarota ma laveai mai. O le tala o loo maua i le Mareko 2:1–5. Ou te iloa o aafiaga ia sa faaaoaga e Iesu e aoao ai ia i tatou ia nisi o aoaoga ma mataupu faavae sa tele lava ina musuia ma faigofie ona malamalama ai.

O se tasi o tagata o i lenei tala o se alii e maua i le supa, o se tagata e le mafai ona minoi e aunoa ma se fesoasoani. Na o le mafai ona nofo lenei tagata i le fale, ma faatalitali mo se fesoasoani.

I lo tatou vaitaimi, atonu e tupu faapenei. E toafa tagata sa faataunuuina se tofiga mai le latou epikopo e o e asiasi, i se fale o se alii e maua i le ma’i o le supa. E mafai ona ou iloa atu o se tasi o i latou e sau mai le Aualofa, e tasi mai le korama a toeaina, tasi mai le Perisitua Arona, ma le tagata mulimuli, o se faifeautalai faamisiona e toatasi. I se fonu a le uarota lata mai nei, ina ua uma ona fefautuaai faatasi e uiga i manaoga i totonu o le uarota, sa tuuina atu e le epikopo ni tofiga “laveai”. Sa tofia nei tagata e toafa e fesoasoani i lenei alii o mafatia i le supa. E le mafai ona latou faatali seia sau lava ia i le lotu. E tatau ona latou o atu i lona fale ma asia o ia. E tatau ona latou sailiina o ia, ma sa latou o ai. Sa aumai le tagata ia Iesu.





“A ua o mai nisi ia te ia, ua au mai le tagata supa, o loo fataina mai e le toafa” (Mareko 2:3).

Peitai, sa tumu tele le potu. Sa le mafai ona latou ofi mai i le faitotoa. Ou te mautinoa sa latou taumafai mea uma na mafai ona latou mafaufau i ai, ae sa le mafai ona ofi mai i totonu. E lei ogatasi mea na tutupu e pei ona sa latou fuafuaina. Sa i ai ni faaaitaui i le ala o le “laveai.” Ae latou te lei toilalo ai. Latou te lei tuulafoaia le tagata supa i le faitotoa. Sa latou fefautuuaai faatasi i le isi mea e fai—pe faapefea ona latou aumaia le tagata ia Iesu Keriso mo le faamalologa. O le galuega o le fesoasoani atu ia Iesu Keriso i le laveaia o agaga, ia i latou lava, e lei faigata tele. Sa latou faia se fuafuaga—e lei faigofie, ae sa latou faataunuuna.

“Ua le mafai foi i latou ona faalatalata atu ia te ia, aua le motu o tagata, ona latou tatala lea o le ufi o le fale sa i ai o ia: ua faasosofa i ai, ona latou tuutuu ifo ai lea o le moega o taoto ai le supa” (Mareko 2:4).

Sa latou aveina o ia i luga o le tualuga. Ma le mafaufau e leai se faasitepu i fafo latou te feaei ai, o le a tele foi se taimi e alu e ave uma ai tagata i le tualuga. Ou te manatu atonu sa tupu i le auala lenei: semanu e a’e muamua le alii talavou mai lana uarota i le tualuga. Aua e laitiiti ma e malosi

tele, e le faigata tele mo ia. E tatau ona malosi le uunai mai lalo o lana soa o faiaoga o aiga mai le korama a toeaina ma le faifeautalai faamisiona umi ma malosi. O le tuafafine o le Aualofa e faamanatu ia i latou ina ia faaeteete ma avatu ni upu o le faamalosiuga. Ona aveese lea e alii o ufi o le fale ao faaaauu pea ona faamafanafana atu le tuafafine i le tagata ao ia faatalitali e faamaloloina—ina ia mafai ona minoi lava ia ma ia saoloto.

O lenei tofiga laveai e manaomia tagata uma ina ia galulue faatasi. I le taimi sili ona taua, o le a faaoga ai se faatulagaga mataalia ina ia tuutuu ifo i lalo le tagata supa mai le tualuga. E tatau ona galulue faatasi ma le lotogatasi tagata e toafa. E le tatau ona i ai se feeseeseaiga ia i latou e toafa. E tatau ona latou tuutuu ifo i lalo le tagata supa i le tulaga lava e tasi. Afai ae vave ona faamaamulu e se tasi le maea nai lo le isi toatolu, o le a pau ese le tagata mai le moega. E le mafai ona ia taofia ia lava ona o lona tulaga vaivai.

Ina ia mafai ona fesoasoani atu i le Faaola, e tatau ona tatou galulue faatasi i le lotogatasi ma le ogatasi. E taua tagata uma, tofiga uma, ma valaauga uma. E tatau ona tatou tutu faatasi i lo tatou Alii o Iesu Keriso.

Na iu lava ina taoto le tagata supa i luma o Iesu. “Ua silafia e Iesu lo latou

faatuatua, ona fetalai atu lea o ia i le supa, Lo’u atalii e, ua faamagaloina au agasala” (Mareko 2:5). Sa faaali e Iesu le alofa mutimutivale ia te ia ma faamaloloina o ia—e le na o le faaletino ae faapea foi i le faaleagaga: “Atalii e, ua faamagaloina au agasala.” Pe le matagofie ea lena mea? Pe tatou te le mananao ea ia tupu lena foi mea ia i tatou? Ia te au lava ia, ioe.

O tatou iloa ea se tasi i o tatou olaga o mafatia i se supa faaleagaga, se tasi ua le mafai ona toe foi mai na o ia i le Ekalesia? E mafai ona avea o ia o se tasi o a tatou fanau, se tasi o o tatou matua, se toalua, po o se uo.

Faatasi ai ma lo toatele naua o faifeautalai faamisiona o loo avanoa i iunite taitasi o le Ekalesia, o se tulaga atamai mo epikopo ma peresitene o paranesi le faaoga lelei o a latou aunofa a uarota ma paranesi. E mafai ona valaaulia e epikopo tagata taitasi o le aufono a le uarota e o mai ma se lisi o igoa o i latou o e atonu o manaomia se fesoasoani. O le a fefautuuaai faatasi ma le mataalia ia tagata o le aufono a le uarota i auala sili latou te fesoasoani atu ai. O le a faalogologo ma le mataalia ia epikopo i manatu ma faia ni tofiga.

O faifeautalai faamisiona o ni punaoa sili lea i totonu o uarota mo nei taumafaiga laveai. E laiti i latou ma

e tumu i le malosi. Latou te fiafia ina ia maua se lisi o igoa patino e galulue ai. Latou te fiafia e galulue faatasi ma tagata o le uarota. Latou te iloa o avanoa sili nei mo i latou e sailiili ai. Latou te tuuto atu i le faatulagaina o le malo o le Alii. Ua ia i latou se molimau malosi o le a avea atili i latou faapei o Keriso ao latou auai i nei taumafaiga laveai.

I le faaiuga, sei ou faasoa atu ia te outou se tasi o oa natia o loo maua i lenei tala faatusipaia. O loo i ai i le fuaiupu e 5: “Ua silafia e Iesu *lo latou faatuatua*” (faaopoopo le faamamafa). Ou te lei iloina lenei mea i le tuainai—*lo latou faatuatua*. O le a aafia foi i le tuufaatasiga o le faatuatua le soifua laulelei o isi.

O ai na tagata ia na ta’ua e Iesu? E mafai ona aofia ai le toafa o e na fataina le tagata supa, o le tagata supa lava ia, tagata o e na tatalo mo ia, ma i latou o e na i ai iina na faalogologo i le talaiga a Iesu ma vivii lemu i o latou loto mo le vavega o le a vave ona oo mai. E mafai foi ona aofia ai se toalua, se matua, se atalii po o se afafine, se faifeautalai, se peresitene o le korama, se peresitene o le Aualofa, se epikopo, ma se uo mamae. E mafai ona tatou fesoasoani uma i le tasi ma le isi. E tatau ona tatou auai ma le naunautai e le aunoa e saili ina ia laveai mai i latou e i ai manaoga.

Ou te molimau atu o Iesu Keriso o se Atua o vavega. E alofa Iesu Keriso ia i tatou uma ma e i ai le mana e laveai ai ma faamaloloina, i le faaletino ma le faaleagaga. A tatou fesoasoani ia te Ia i Lana misiona o le laveaiina o agaga, o le a laveaiina foi i tatou i le faagasologa. Ou te molimau atu ai i Lona suafa paia, o Iesu Keriso, amene. ■

FAAMATALAGA

1. Tagai, mo se faaitaiga, Thomas S. Monson, “O Lo Tatou Tiutetauave le Laveai,” *Liahona*, Oke. 2013, 5.



Saunia e Elder D. Todd Christofferson

○ Le Korama a Aposefelo e Toasefululua

Saoloto e Faavavau, e Galue mo i Latou Lava

O le finagalo o le Atua ia avea i tatou o ni alii ma ni tamaitai saoloto e mafai ona tulai ae i o tatou gafatia atoatoa uma faaletino ma le faaleagaga.

E aofia i le ata faatino a Viliamu Siekispia *The Life of King Henry V* se vaaiga i le po i le toluapiga a fitafita Peretania i Agincourt a o lei o atu e tau ma le autau a Farani. I le taupulapula o moli ma le tau le iloa ato o ia, sa savali atu ai Tupu Enele ma le leiloaina i ana fitafita. Sa ia talanoa ma i latou, taumafai e suesue le talitonuga o lana autau toalaiti, ma e talu ai latou te lei iloa po o ai o ia, sa tuusao mai ai o latou manatu. I se vaega o le latou talanoaga sa talanoaina po o ai e nafa ma le tiutetauave mo mea e tutupu i alii i le taua—o le tupu po o fitafita taitoatasi.

I se tasi taimi sa tautino atu ai Tupu Enele, “Ou te manatu e matua faamalieina au pe a ou oti i le autau a le tupu nai lo se isi mea; aua e tonu ana mafuaaga.”

Sa tali atu Mikaele Viliamu, “O lena mea e le oo i ai lo tatou iloa.”

Sa ioeina e se isi fitafita, “Ioe, pe sili atu foi i lo le mea e tatau ona tatou saili i ai, aua ua lava lo tatou iloa, afai o i tatou o auauna a le tupu: ae a sese ana mafuaaga, ia o lo tatou ususitai i le tupu e tafisea ai le solitulafono mai ia i tatou.”

Sa faaopoopo atu Viliamu, “Afai e le lelei le mafuaaga a le tupu, e pa’ū lava la i luga o le tupu taunuuga o mea na ia faia.”

E le o se mea e faateia ai le le ioeina e Tupu Enele, “O fitafita uma e tofu ma sona tiute e fai i le tupu; ae e nafa le tagata lava ia ma lona agaga.”¹

E lei taumafai Siekispia e foia lenei finauga i le tala, ma i soo se tulaga lava o loo faaauau pea lenei finauga e oo mai i o tatou lava vaitaimi—o ai e nafa ma le tiutetauave mo mea e tutupu i o tatou olaga?

A oo ina le lelei ni mea, e i ai se tulaga o le tuuaia o isi ma e oo lava i le Atua. O isi taimi e manatu ai nisi e tatau ona faia e isi ni mea mo i latou, ma saili atu ai tagata taitoatasi po o ni vaega e lafo atu i isi tagata po o le malo le tiutetauave mo lo latou manuia. I mataupu faaleagaga e manatu ai nisi e faapea, e le manaomia e alii ma tamaitai ona tauivi mo amiotonu patino—aua e alofa ma laveaiina i tatou e le Atua “e pei ona tatou i ai.”

Ae ua faamoemoe le Atua e tatau i Lana fanau ona galulue e tusa ma le faitalia ua Ia tuuina atu ia i latou, “ina ia mafai e tagata taitoatasi ona tali mo ana